



La «Clavadeira» a Riom, il bajetg da teater da l'Origen Festival Cultural, ha retschet in premi, l'«award» per marketing ed architectura en la categoria objects culturals.

FOTO B. VERSCHUUREN

Premi d'architectura per Origen

■ (anr/gns) Dapi il 2008 vegn surdà mintga dus onns en Svizra l'«award» per marketing ed architectura». Surdà vegn quel premi en set categorias e vi-tiers anc dus premis speziels. Per ils premis 2016 èn vegnids inoltrads 55 projects e suenter ina selezziun seriusa ha la giuria, che sa cumpona dad 11 persunas dal rom, nominà 27 projects per in dals set premis. En la categoria objects culturals e dal public ha l'Origen Festival Cul-

tural retschet il premi per il nov bajetg da teater, la «Clavadeira», a Riom. L'intern da la nova chasa da teater ha persvas la giuria e la lavur architectonica da *Roman Derungs* e *Carmen Gasser Derungs*. La sala istorica da teater en il clavà dal bain «Sontga Crousch», il dachasa da l'Origen Festival Cultural, è betg mo adattada per teater, mabain er per concerts, saut, prelecziuns ed autras occurrenzas culturalas. En concorrenza cun Origen èn tranter

auter stads ils suandants projects: Biblioteca, Spiez, Center da cultura, Rapperswil-Jona, Bogn public, Sierre e la staziun principala, Vienna. Dasper la «Clavadeira» a Riom ha cun il «Portal» il restaurant e bajetg d'entrada da Lai Pendicularas SA a Curvalda in ulteriur project grischun retschet in premi, quel en la categoria us-tariars, bars, residenzas ed auters objects turistics. Surdads èn ils premis vegnids a Lucerna en il center da cultura «KKL».